



蜀中邊防記卷之一



閔中曹學佺能始著

川西一

松潘 漳臘 小河

松潘道開府松潘衛與副總兵官一員分城而居叅將一員舊駐小河千戶所今移駐龍安城遊擊將軍一員駐劄漳臘堡守備都指揮一員駐劄平番堡其餘把守練兵官各有差。按後漢書建武九年司徒掾班彪上言舊制涼州部置護羌校尉持節領護理其怨結歲時巡行問所疾苦又數遣驛徒通導動靜

使塞外羗夷為吏耳目州郡因此可得儆備今松潘
備兵即古護羗使者之職也○尋江源縣記云松州
平康縣羊膊山下有二神湫乃大江始發之所自羊
膊嶺散漫始末濫觴東南百餘里至白馬嶺回行二
千餘里至龍涸水障始於是也志曰江發源于臨洮
之木塔山至山頂分東西流者即岷江也由草地甘
松嶺八百里至漳臘其水漸大漳臘由鐮刀灣達松
潘于下水關入紅花屯達壘溪至穆肅堡黑水從南
合之入深溝經茂州南至于威汶轉銀嶺合草坡河
至蠶岩入灌口分道而下由威至玉壘山為玉輪江

至汶為皂江至灌為沫江○志又曰衛北三舍有龍
潭四序淵澄其深莫測有嶺謂之小分水嶺又有大
分水嶺山高峻而水派流在衛北二百里外○四夷
傳曰西羗之本出自三苗其先為伯夷甫炎帝之裔
帝母育于姜水而以姜為姓故諸羗亦姓姜其國始
近南岳及舜徙之三危今河關之西南羗地是也濱
於賜支至手河首縣地千里賜支者析支也王政脩
則臣伏德教失則寇亂本無君長夏末及商周之際
或從侯伯征伐有功天子爵之以為藩服羗爰劔者
秦厲公時為秦所執以為奴隸羗人謂奴為無弋故

號為無弋爰劔後得亡歸將其種人南出賜支河其
後子孫各自為種或為菴牛種越雋羗是也或為白
馬種廣漢羗是也或為參狼種武都羗是也至爰劔
曾孫忍及弟舞獨留湟中忍生子研故羗中號其後
為研種漢景帝時研種留何求守隴西塞於是徙留
何等於狄道安故及武帝西逐諸羗乃渡河湟築令
居塞始置護羗校尉從爰劔種五世至研研最豪健
以研為種號十三世至燒當復豪健其子孫更以燒
當為種號滇良者燒當之玄孫時王莽末四夷內侵
及莽敗衆羗還據西海光武之世以牛邯為護羗校

尉即此地也及燒當至滇良世居河北大允谷種小
人貧而先零卑湍竝皆強富數侵犯之滇良父子積
怒從大榆中入掩擊先零卑湍大破之掠取財富奪
居其地大榆中由是始強滇良死子滇吾立附落轉
盛常雄諸羗在晉內附以其地屬汶山郡宋齊亦得
之後為西魏所有馬魏書鄧至傳王像舒治者竝白
水羗也常為羗豪自稱鄧至王其子舒彭遣使內附
拜龍驤將軍益州刺史甘松縣開國子鄧至王請以
封爵授子彭奮高祖許之拜奮建忠將軍甘松縣開
國子即為小藩朝貢相繼關中亂乃絕後魏末王鄧

至番始統有其地後周保定五年於此置龍涸防天和元年改置扶州領龍涸郡隋初廢州郡以其地併入汶山同昌二郡唐武德元年置松州貞觀二年置都督府松澗懿嵯濶隣雅聚可遠奉嚴諾我彭軌盍直肆位玉璋祐臺橋序等二十五羈縻州永徽之後生羗相繼服叛不常儀鳳二年復加整比督文扶當柘靜翼六州都督羈縻研州劔州探邠州杞州毗州河州幹州瓊州犀州拱州龕州陪州如州麻州霸州礪州光州至涼州蠶州擘州梨州邏州思帝州眺州戍州統州穀邛州樂容州達達州卑州慈州凡三十

一州據天寶之載薄松州都督府督一百四州其二十五州有額戶口頗多但羈縻處散餘七十九州皆生羗部落或臣或否無州縣戶口矣天寶初改松州為交州郡乾元初復為松州按貞觀之時分十道松文扶當悉柘靜等州屬隴右道永徽之後割屬劍南道也○寰宇記云松州治嘉城縣按嘉城縣即後魏白水羗像舒治所據也其子舒彭遣使朝貢拜龍驤將軍始置甘松縣矣後周之龍涸防及改置扶州皆治于此隋曰嘉誠唐曰嘉城則為松州之所治也○志曰甘松嶺在衛西北三百里州以此名按山海經

云甘松嶺亦謂之松葉嶺即江水發源於此土人謂之松子嶺也又有石門水自龍州石門山連亘經郡界合江故曰石門水矣。寰宇記曰松州屬縣有平康交川按平康縣晉屬汶川郡隋屬會州後廢唐垂拱元年割交川及當州通軌翼斜三縣置平康縣屬當州。○交川縣後周天和中置隋屬會州唐改屬當州志云平康交川二廢縣俱在衛治西。○通志曰潘州者唐廣德初年松州陷於吐蕃五代諸羗各據其地宋崇寧取邦潘疊三州初屬吐蕃首領潘羅支此潘州之名所由起也元屬吐蕃宣慰司國初洪武十

一年御史大夫平羗將軍丁玉克復其地設松州潘州二衛後併為松潘衛鎮守茲土者二十年後復改松潘等處軍民指揮使司隸四川都司屬川西道領守禦千戶所曰小河安撫司四曰八郎曰麻兒匝曰阿角曰芒兒志曰八郎山在衛北三十里山下為八郎安撫司也長官司十七曰占藏先結曰蠟匝曰白馬路曰山洞曰阿昔曰白定曰麥匝曰者多曰牟力結曰班班曰祈命曰勒都曰包藏曰上阿昔曰思曩兒曰阿用曰潘幹寨各降符印列為守土焉復立番僧二人為國師曰商巴曰綽領二人為禪師曰黎巴

日完下亦皆佩銀章也。○西邊記云國師商巴佛教也禪師黎巴道教也其寺觀散居寨落以主化導番夷丁大夫時設鑄金銀錠有足或無足者賞給諸番番呼曰丁大夫寶重五六兩者番價值三五十兩其家有一二錠遂名為財主錠發夜光稱神異矣。○龍涸志云男曰安達女曰白麻多種青稞圓根好用羶羊麥粉宋史云松番之俗日耕野壑夜宿碉房刻木契以成交易炙羊膀以斷吉凶人精悍善戰聞也。○志云其地廣六百七十里袤千六十里編戶通二十一里東至龍州界一百九十里西至牟力結吐蕃草

地界四百八十里南至疊溪守禦千戶所界二百里北至陝西洮州衛界八百六十里距成都七百六十里雪嶺面于東洮河界其西雪嶺其色如銀俗呼為寶頂山蚕崖路險人跡罕到即老杜所稱松州雪嶺東也洮河發源岷山北流入陝為臨洮府南入川與江漢會矣。○三邊志曰金蓬山在東南五里羗金蓬者居之山下石崖鑄永泉二字正統初都督季安以劔斫崖而得二水亦名文武水。○紅花牛心二山各去衛十五里峰巒圓秀者牛心也紅花有屯田是名紅花屯矣又東四十里為火蹇山山無草木其色如

蜀中遺跡記 卷之一
褚○志云城西有大悲寺唐天寶間僧智廣所創也
國初設僧綱司以僧惠心為都綱掌其事景泰改元
吐蕃猖獗累欲發兵剿討嗣都綱智中往撫諭之番
乃革心向化事聞陞智中為崇化禪師賜以銀印冠
帽袈裟藏經之屬智中浙之仁和人姓姜氏別號一
天○赤松觀在古松之南世傳三皇時兩師隨風雨
上下莫知其跡於此地飛昇後人立詞焉元鼎失馭
兵燹之餘其跡尚存開國己卯錢塘羽士顧道昇來
棲於此游神清淨人向往之於是觀宇為之一新落
成道昇詣蜀獻王請額時荆南道士劉虛丹進赤松

子畫像及中誠經正展覽間而道昇適至王偉其誠
遂命教授張景辰隸古赤松觀四字及所進經像以
歸道昇復於後殿築玉皇閣金碧輝煌殆與雪山相
掩映也○四夷考云宣德二年松潘千戶錢宏聞有
交趾之役憚於遠征乃誘蠻族入寇請奏張報得留
不遣蠻自是煽禍攻圍城堡調官軍五千討之至威
州黃土鋪失利道遂不通三年命總兵都督陳懷等
帥西軍四萬由洮州入松潘解圍猶弗克靖八年復
調川貴官軍協力從事始克成功正統四年都指揮
趙諒誘執蠻酋國師商巴以祀邊間遣都督李安征

之尋誅諒誣妄蠻乃服然猶二三十年始設松潘
巡撫都御史一員以都御史寇深及侍郎羅綺相繼
臨之咸有成績綺還京提督文臣不復更置但以備
兵使者整飭之而已天順五年蠻截我糧道入龍安
石泉等處成化十三年勢益猖獗復勅撫臣張瓚調
漢土官兵五萬由東南二路分進剿滅白羊嶺鴛飲
溪等二十一寨斬蠻首級四百餘顆於是商巴等二
十六族詣軍門獻馬納款各諭以利害遣之十四年
正月復攻黃頭復水諸寨前後殺獲男婦七百餘人
赭其碉房九百墜崖死者不可勝計亦一大創矣弘

治間跳梁如故南路梗阻正德二年副總兵楊宏誘
殺綽嶺寺國師雪郎王出自後本寺小宛下等動稱
報讐松城之外不敢晝收嘉靖十一年勅副總兵何
卿來節制諸軍相機剿討烏都等十一寨皆次第平
而詣軍門送款者曰至矣卿家視松州諸所繕緝百
廢俱興藩籬以固兵威亦震百蠻喘息不敢動垂五
十年來生齒日繁復萌戎心時出殺人剽掠行旅萬
歷八年兵使者楊一桂是以有三寨之役又雪山國
師喇嘛等四十八寨勾虜為患邊氓岌岌十四年都
御史徐元泰是以有會剿之役及丙申九月秋高虜

騎突由寒盼黃勝草場分道馳入圍漳臘守備張良
賢率兵破之斬首六級又攻鎮虜百戶杜世仁歿戰
斬首四級城得保全世仁死焉又攻制虜臺前後斬
首十一級虜遁去良賢追至思答拜又大破之斬首
十六級虜乃失利去初虜之入也襲我無備偵者不
知其數及遁去巡視營壘不下五千餘灶未幾有番
婦逃回言所斬虜級中有大落赤之姪小王子在焉
虜以此必欲報讐故昔之松潘重在番今之松潘重
在虜矣○四夷考曰松潘西至流沙關相連天竺西
南達紅土坡生番多係北虜出沒地勢遼絕非可限

域惟是南通疊茂威灌東通小河龍安北通漳臘墩
臺守禦凡八十七所戍守主客官軍舍餘遊兵一萬
一千六百八十餘人歲額坐邊倉一十六處糧九萬
九千三百八十餘石而增設之處不與焉○東路經
畧志云松潘以東望山關雪欄關風洞關松林堡紅
崖關三舍堡鎮遠堡小關子堡松了堡三路堡師家
堡四望堡凡十二處抵小河千戶所四崖絕壁一線
之逼附近水牛毛公羊洞諸番未甚駕檄今以三舍
關為始第其里次○三舍者去衛城九十里而遙也
為小河適中地有把守指揮一員管轄上至望山下

至四望共十三關堡羊腸鳥逕峭壁危湍嶮巖萬狀
番夷往往潛伏而窺伺焉三舍上十里為伏羗堡伏
羗上十里為紅崖關紅崖上十五里為松林堡志云
黑松林關在治東七十里松林上九里為風洞關志
云風洞關在治東五十里洞深不可測多惡風午輒
大作作則灰沙蔽天人馬皆辟易寒氣襲人觸之多
橫死否亦喘息旬日蓋山嵐鬱蒸之氣所發也關北
鹽井墩即古鹽川廢縣風洞上五里為雪欄關志云
治東三十里雪欄山四時積雪不消俗呼為寶頂山
關在山下雪欄上十二里為望山關關上八里即松

州也三舍下十里為鎮遠堡鎮遠下八里為小關堡
志云小關子在治東百二十里小關下八里為松塢
堡松塢七里為三路堡三路下八里為師家堡師家
下八里為四望堡又二里為小河所矣○南路經畧
志云松潘以南紅花屯熊楨屯西寧關小屯堡安化
關鎮華堡新塘關艾蒿堡歸化關北定關蒲江關平
夷堡金瓶堡鎮平堡鎮番堡靖夷堡平定堡凡十有
七處抵疊溪界○四夷攷曰南路自西寧關起以至
平定堡河東大姓屬牛毛土官管轄河西小姓屬羊
毛土官管轄即志所謂牛腦羊腦也不服冠帶不受

約束喜則同部落席地歡飲怒則持刃彼此相擊尊
卑之序蕩然矣萬曆初年河東頗肆憑陵十四年征
之搗其巢穴斬首二千餘級焚碉房千餘座始傾心
向化理奴誓願認守地方迄今不敢犯河西恃有長
江之阻逆我文告其時亦震讟移遁深箐隔岸羅拜
乞降許之有國師喇嘛灣仲者漸獻皮幣于王韃乞
師伏於鐵爐溝以牽制我乘便邀擊事覺就擒其謀
始破而膽落也○歸化關志云在司南百里案字記
霸州有歸化縣置在移村各有部落主持無徵科今
雖失故處而關名寔因之地形險要上至西寧下至

鎮江關堡凡九把守指揮一員以龍溪等寨大小橫
梁為諸番所出沒也歸化上七里為龍韜堡龍韜上
十里為新鎮關新鎮上十里為百勝堡百勝上五里
為安化關安化上七里為雲屯堡雲屯上八里為西
寧關志云在治南三十里西寧上八里為雄溪屯則
南路之首也鐵爐溝諸夷在其界矣○歸化下十二
里為北定關志云北定關有祠祀二邊史劉方五將
正德六年番僧雪欄王出謀為不軌守將指揮邊輔
史寬百戶劉賢方捷櫻鋒以戰輔寬遇害於黃土坡
賢捷被執至寨縛柱將剖其心二將罵不絕口而止

事聞與子孫進一級承襲弟輔輪承兄職嘉靖七年
巡南路至北定關遇橫梁茹兒等番輪率其僕邊永
興軍餘史卜西等數人與戰已取勝值天雨溪泛諸
番四集輪被傷永興負輪行數十步至崖不能進執
刃亂揮知不可支乃伏於輪身主僕俱被害事聞贈
輪都指揮僉事永興百戶史卜西等俱厚賚優恤焉
北定下十有一里為鎮江關別拓大小耳別等寨在
其界內寰宇記云歸化縣有大鼇山小鼇山在霸州
西北一十里號符堅城又云於小鼇山上村置牙利
縣或即大小耳之故迹也鎮江下四里為平番堡平

番下八里為平夷堡其地寬平僅容千騎為四十八
寨飲盟插血之地即黃沙壩矣萬曆十四年建城堡
設守備一員把總練兵官一員管轄自西寧關至平
定堡焉鎮平關上七里為金瓶堡金瓶上六里為平
夷堡鎮平下七里為鎮番堡鎮番下八里為靖夷堡
靖夷下八里即平定堡也平定下八里為永鎮堡係
松茂二鎮交界處鎮平堡則指揮一員守之○北路
經畧志云松潘以北穀粟屯高屯子羊裕屯唐舍屯
譚廓屯漳臘屯以上凡七堡抵吐番洮河界○四夷
考云漳臘堡設在河東去城三十八里松州之背也

舊制駐劄守備一員管轄上下關堡為寒盼口工中
潘州工下羊洞等隘口自漳臘北去遼廓幽遠一望
無際蓋萬騎可從容矣近改設遊擊一員以鎮壓之
良審所重也漳臘工十五里為鎮虜堡在河東元山
子工志云堡在漳臘東北十里堡後天險墩堡前觀
化墩河東于襄臺河西制虜臺聲勢相望然直北為
敵貢壩舊掘品字賺坑數百中置鋒刃木簽口覆芭
土以掩其形又北去三里曰城墻岩東臨河畔西抵
山麓掘壕寬深丈許橫截六百餘丈明斷彼路河西
川盼溝壕塹之制亦如之越溝二十里登阿玉嶺之

巔可矚黃勝草場志云黃勝在漳臘西南十里也場
之東有阿玉口凡二十里透嶺出川盼則可南可北
惟所馳驅議者于天險觀化二墩充拓寬廣石砌墻
垣一周外掘壕塹以防衝突亦庶幾搯其吭云鎮虜
堡上二十里之栢木橋即界外矣○漳臘下七里為
虹橋閩係松城北隘志云松州北二十里有落虹橋
長二十丈餉道所必經也虹橋下七里為譚廂屯譚
廂下七里為塘舍屯塘舍下六里為羊裕屯羊裕下
六里即松城又虹橋下八里為高屯子高屯下七里
為穀粟屯穀粟下十里亦即松城也離松十四里為

流沙關乃北虜經由地每秋防必加意焉松城下五里為紅花屯紅花下七里為雄溪屯雄溪左十三里為東勝堡歲熟番受賞可稱無事惟是虹橋西北十五里為絕塞墩北界黃山尖殺鹿塘黃勝草場等處路通洮岷先年陳懷率兵由此道入解松圍今為番虜間阻以其往來射獵于斯也下潘州白利等番扶牛羊羶毳來或由阿玉嶺或由鐵門墩出抵寒吟祈命諸寨貿易茶斤歲以為常稍失防範釁端輒起且阻絕長溝救援難及形勢孤懸所最當籌度議者于墩前石砌聯城一座直抵河下以通水道又依山樞

壕絕其乘高則于覆壓手何有○古蹟志云潘州故城在衛北七百五十里漢武帝時逐諸羗渡河湟居塞外築此城置護羗校尉以禦之宋時分上下中潘三州今阿失寨即上潘州班班寨即下潘州界二州之間則中潘州也其地愈北山愈平夷舊漳臘之設在下潘州○侍郎羅綺漳臘新記云距松衛治之北百里曰漳臘即古潘州也城之故址尚在其下有巖穴空洞幽邃廣可容列騎深亦不知幾許旁有玻璃泉冬夏淵然不涸其土地膏腴山川秀麗蓋自唐盛時所開拓雖隸版圖而土蕃酋長猶然竊據所謂但

羈縻之而已宋元以來無復中國有我朝混一華夏
極天極地莫不臣服洪武十一年王師始下瀋州入
與編民賦役無殊乃於其地建置屯堡使士卒且耕
且守累數十年足食足兵邊人安堵宣德丁未守將
失取以羗蜂起梗我餉道燹我閭塞而瀋州復為所
據者凡二十有八年景泰辛未予奉命來鎮茲土不
揣思欲平復之乃大集諸酋陳以逆順禍福無不稽
顙聽命於是復增置城池樓櫓凡戰守之具視昔有
加焉不彈一石之粟不勞一人之力而數千百頃沃
饒之地遂復為我有又晏然置城於其間俾兵農雜

居累歲豐獲邊人安枕寔朝廷威德所及予何功之
與焉或者以瀋州之城與唐世籌邊樓相頽頽後先
予亦豈敢多讓景泰六年記○曹學佺曰今之漳臘
去松州一舍而遙非百里外之漳臘矣前張後弛勢
使然也予以庚戌署藩司事料松邊兵食聞達虜住
收於漳臘城內有百五六十帳殊駭聽聞乃檄漳臘
遊擊何奮武得回牒云謹按漳臘一鎮五隘九屯一
十八墩堡延袤二百餘里襟帶山河襟居夷虜所由
來矣前不具論萬曆二十四年火落赤入寇彼時內
有守備張良賢救應以截其鋒外有合壩犄角以牽

其勢雖虜衆攻圍鎮虜三晝夜而不能破于時掌堡
百戶杜世仁也豈異人任而其父子督軍兵數百人
乃能射死小王子斬首數十級松漳卒賴以無事而
合壩遂因之任牧馬績在三十二年廢將李宗望代
庖漳臘又有合兒頓奪咱毛兒頓等韃接連投居會
治兵使者亦署官也後然有張伐之意輒撫賞安插
牛馬羊隻布滿山溪毛帳羶房星列草地猶肘腋間
眠虎豹門庭內收犬羊逐之恐釁端自此發也聽之
恐禍本無所終也彼其往來漳松之間豈惟共我水
草利我鹽茶凡倉庫之虛實軍兵之強弱道路之衝

要無不盡知萬一生心何以制而禦之惟是高屯堡
者在虹橋之內禦寇之下譚廡之西正適中要地實
乃松鎮以北之藩屏也議設把守一員撥唐順等軍
五十名以耀威武而坐搯其吭焉誠為長策矣第當
展築屯基寬包隙壩貫路於中不惟容衆且可據險
緣由到司覆看得松潘者蜀西之門戶漳臘者松潘
之咽喉也自土韃合壩合兒等住牧其中頓羶房羶
室以百五六十計犬羊之性馴擾無常非我族類其
心必異豈非他日之隱憂哉昔者隋唐之禍可鑒已
但既來之則安之可以理而諭也方來者所當拒可

以勢而禁也惟是漳臘之鎮虜堡原設把守一員地方遼濶勢本孤懸今且伏戎在內萬一有變聲息不相聞何暇左右顧議者以高屯堡要害之處添設把守以遏其衝且與漳臘為特角誠策之善者也該堡事務仍令本官兼攝巡視軍兵即在各營抽選亦無所糜費矣若夫整行伍除戎器綢繆未雨有備無患此該道將之事也時當事者如議行之○小河千戶所國初洪武十一年與松潘衛同置在衛東百九十里宣德四年調成都前衛後所官軍實治之仍隸松潘按小河之地古名涪陽以水出松潘分水嶺入涪

江也地在涪水之陽矣○志云所北二十里師家山一名文山宋時師文二大姓居之山麓有文山關又有師家鋪則界于龍州也東有獅峯西有象嶺各離一里許有靈泉焉出獅峯下○經畧志云松潘又東為堡七曰蜂崖葉崇馬營水進鎮夷鉄龍乃抵龍安○四夷考曰小河之下鉄龍之上惟葉崇為要隘有葉崇把守官轄之東通白馬毛公西通竹頭野猪白草諸寨工六里為峯崖堡峯崖工十里即小河也下四里為馬營堡馬營下七里為水進堡水進下八里為鎮夷堡鎮夷下十里為乾坤堡乾坤下二十里為

鐵龍堡堡有西山對峙峭壁萬仞二水會流深不可測工為鐵索橋索凡六條各長一十五丈引于河之西岸繫以鐵柱中道板蕩行者戒心焉嘉靖間龍州宣撫薛兆乾作亂斬鐵橋以拒官兵旬日松州米貴如金矣鐵龍下十五里即龍安府云○唐史太宗置松州都督府督羈縻二十五州為踞州貞觀元年置領縣二江源洛稽○懿州五年置西吉州八年改為懿州領縣二濶涼落吳○麟州五年置西麟州八年去西字領縣七陝州和善欽具硤源王交利恭東陵○雅州五年置西雅州八年去西字領縣三新城三

泉石隴○蘘州三年置領縣五都流寧遠臨泉臨河其餘屢調湊殷匄器通率鍾並諸羗部落遙立之而已○可州四年置西義州八年改為可州里領縣三義誠清化靜方○遠州四年置領縣二羅水小部川○奉州三年置西仁州八年改為奉州領縣三奉德思安永慈○巖州五年置西金州八年改為巖州領縣三金池甘松丹巖○諾州五年置領縣三諾川歸德籬渭○緘州五年置領縣二常平船川○彭州三年置洪州七年改為彭州領縣四洪川歸遠臨津歸正○軌州都督府二年置領縣四通川王城金源俄

徹○盪州四年置西唐州八年改為盪州領縣四湘
水河唐曲嶺祐川○直州五年置西集州八年改為
直州領縣二集川新川○肆州五年置領縣四歸唐
芳藜鑿水磨山○位州四年置西鑿州八年改為位
州領縣二位豐西使○玉州五年置領縣二玉山帶
河○嶂州四年置領縣四洛平顯川桂川顯平○祐
州四年置領縣二廓川歸定○臺州六年置西滄州
八年改為臺州○橋州六年置○序州十年置崆州
濶州十年置右俱貞觀之時招慰党項羗者舊屬隴
右道改隸松州都督府永徽已後或叛或臣制置不

一今竝廢省聊備古跡而已○唐書吐谷渾西羗名
正益州西北去青海二十五里古析支之地漢西羗
之別種也魏晉以降西羗微弱周滅宕昌鄧至之後
党項始強南雜春桑迷桑等羗北連吐谷渾其種每
姓別自為部落一姓之中復分為一小部落大者萬
餘其小者數千騎不相統一有細封氏費聽氏往利
氏頗超氏野辭氏房當氏米禽氏拓拔氏最為強族
貞觀五年詔遣使開其河曲地為六十州內附者三
十萬口有羗酋拓拔赤詞者甚為渾主伏允所暱與
之結婚屢抗官軍後與其從子思頭並率服與諸首

領歸款列其地為懿嵯麟可等三十二州以松州為
都督府羈縻存撫之拜赤詞為西戎州都督賜姓李
氏自是從河首積石以來並為中國之境後吐蕃強
或拓拔氏漸為所逼逐請內徙聽移部落於慶州因
置靜邊等州以處之故地陷於吐蕃不去者為其役
吐蕃謂之拜藥又有黑党項在赤水之西李靖之擊
吐谷渾也渾主伏允奔于黑党項居以空閑之地及
吐谷渾舉國內屬其黑党項首領號孰善王亦貢方
物其雪山党項姓破丑氏居雪山之下貞觀初亦嘗
朝貢又有白狗春桑白蘭等諸羗自龍朔以後並為

吐蕃所破而服屬焉。有附國者在蜀郡西北二千
餘里即漢之西南夷也嘉良夷即其東部所居種姓
自相率領不屬統一隋大業五年附國王遣其弟子
宜林率嘉良夷等六十人朝貢嘉良有水濶六七十
丈附國水濶一百丈並南流以皮為船而濟南有薄
緣夷風俗亦同西有東女國東北連山綿亘數千里
接党項及諸羗界其地南北八百里東西千五百里
無城柵近川谷傍山險俗好復仇故壘石為巢而居
以避患其巢高至十餘丈下至五六丈每級以木隔
之基方三四步磔上方二三步狀似浮圖于下級開

小門從內上通夜必關閉有二萬餘家俗有重罪止于罰牛妻其羣母及嫂兄弟及父兄亦納其妻好歌舞鼓簧吹笛吹者無服制置尸于高床上沐浴衣服被以羊甲覆以獸皮子孫不哭帶甲舞劍而呼云我父為鬼所取我欲報冤殺鬼○其人輕捷便擊劍漆皮為牟甲為弓長六尺以竹為弦以皮為帽形圓如鉢或戴罽羅衣多毛毼全剥牛脚皮為靴項繫鐵錢手貫鐵釧王與酋帥金為首飾曾前懸一金花徑三寸其土高氣候涼多風少雨土宜小麥青稞山出金銀多白雉水有嘉魚長四尺而鱗細○東女國者西

羗之別種也以西海中復有女國故曰東以別之俗以女為王東與茂州党項接東南與雅州接界隔羅女蠻及白狼夷有八十餘城王之所居名康延川中有弱水南流亦用牛皮為船以渡戶四萬餘衆女王號為賓就有女官曰高霸平議國事在外官僚並男夫為之其王侍女數百人五日一聽政女王死國中多飲金錢動至數萬更于王族求令女二人立之長者為王次為小王若大王死則小王嗣立或姑死而婦繼立無篡奪所居皆重起屋王至九重國人至六重王服青色綾裙下領衫其袖委地重婦人輕丈夫

文字同于天竺以十一月為正每至正月令巫者齎酒散詣山中散糟麥于空大呪呼鳥俄時有鳥如鷄飛入巫者懷中因剖其腹視之有一穀末歲必登若有霜雪必多災異其俗因之名為鳥卜隋大業中蜀王秀遣使招之拒而不受唐武德中女王湯傷氏始遣使貢方物自永徽七年至于天寶元載朝貢不絕其後復以男子為王貞元九年其王湯立志與哥隣國王董卧庭白狗國王羅施忽逋祖國王弟鄧吉知南水國王姪薛尚悉曩弱水國王董辟和悉董國王湯悉贊清遠國王蘇唐磨吐霸國王董藐蓬各詣劍

南西川乞內附其哥隣等國皆散居西山弱水王即唐初女國之弱水部落其悉董國在弱水西故亦謂之弱水西悉董王舊皆分隸置郡祖父例授將軍中即果毅等官自中原多故皆為吐蕃所役屬其部落大者不過三二千戶各置縣令十數人理之土有絲絮歲輸于吐蕃至是悉與之同盟相率獻款兼賫天寶中國家所賜官誥二十九道以進節度使韋皋處其衆于維霸保等州給以糧種耕牛咸樂生業立悉等數國王自來朝召見于麟德殿授立悉銀青光祿大夫歸化州刺史鄧吉知試太府少卿兼丹州長史

薛尚志曩試少府少監兼霸州長史董卧庭行至綿州卒贈武德州刺史命其子利羅為保寧都督府長史龔歌隣王立志妹乞志漫頗有才智從其兄來朝封和義郡夫人其大首領董卧卿等皆授以官俄又授國王兄湯厥銀青光祿大夫試太府卿青遠王弟蘇歷顛銀青光祿大夫試衛尉卿南國王薛莫庭及湯悉贊董龜蓬女國唱後使湯佛庭美王鉢南即唐并授銀青光祿大夫試太僕卿其時西山松州生羗等二萬餘口相繼內附其黏信部落主夢葱龍諾部落主辟葱皆授試衛尉卿立志等并赴明年元會訖

賜以金帛各遣還至八月召韋臯統押羗蠻及西山八國使其部落至今猶代襲刺史等官然亦潛通吐蕃故謂之兩面羗也。陳子昂上蜀中軍事曰臣伏見劔南諸州緣通軌軍屯在松潘等州千里運糧百姓困弊臣不自恤竊為國家惜之伏以國家富有巴蜀是天府之藏也自隴右及河西諸州軍國所資郵驛所給商旅莫不取足於蜀又京都府庫歲月珍貢尚在其外亦不貲矣今邊郡主將乃通軌一軍徭役之弊使百姓貧窮國用不贍河西隴右資給亦減臣伏惟松潘諸軍自屯鎮以來於今相繼百十餘年竟

未聞盜賊大侵而有尺寸之效今國家甘心竭力以事之臣不知其故伏惟念惜臣在蜀時傳聞潘松等州屯軍數不逾萬計糧餉年不過七萬餘碩可盈足邊郡主將不審支度乃每歲向役十六萬夫夫樁糧輸送一斗之米價錢四百使百姓老弱未得息肩比年以來多所逃亡臣伏以吐蕃未忍即滅松潘屯兵未可廢散若准此賦歛每年以十六萬夫運糧臣恐更三年吐蕃未殄滅斂南百姓不堪此後恐非聖神制教安人富國彊兵之神算也愚臣竊聞蜀中耆老平議斂南諸州比來以夫運糧者且一切並停請

為九等稅銀以市驪馬差州縣富戶各為屯駐稅錢者以完脚價各次第四番運輦不用一年夫運之費可得數年軍食盈足比如常運減省二十餘倍蜀川百姓永得休息通軌軍人保安邊鎮京臺府庫河西軍馬得利供輸臣伏審計便宜體大非一二狀具盡○中大夫曰陳拾遺論蜀西邊事而首及糧運誠知所先務也予署司事因治兵使者議買虜米回檄開府云松潘重鎮控馭蕃虜緩急時有積儲宜先今該道酌議買米萬石以備不虞誠未雨綢繆之計思患預防之道也第轉運事宜尚有未盡者亟採之輿論

參之臆見開列數款于後。一均民運何則松茂邊糧自崇慶邛灌新繁崇寧溫江六州縣此南路也自綿州彰明江油平武梓潼五州縣此東路也南路者灌縣買米起運而威茂驗糧通判督之東路者于江油縣買米起運而龍安驗糧同知督之其法非不犁然具也但領買者為店戶即包攬之別名領運者為脚戶即逋逃之淵藪店與脚合則通同為奸店與脚分則彼此推調積欠盈萬追併虛文邊儲匱乏職此之由今南路者已議起派各州縣矣均之一餉也東路獨不可做而行之乎應照例酌派綿州彰明江油

平武各州縣而種潼土瘠穀稀又與餉道偏左特令裁去以安縣代之蓋安縣首建此議當不辭難耳說者曰江灌領運者此脚頭也各州縣領運者亦此脚頭也法更人故能保無弊蓋事不擇人貴行之有法以二驗糧官之事而散之十一州縣無獨任之難以各州縣之米而自徵自解又責成之易何不舍其難以就所易者乎。○一定會計何則松茂各倉有長中短之別焉自南路言之在西寧安化等一十五處者謂之長倉每石脚價自一兩一錢二分以至一兩五錢五分在疊溪晉安等八處者謂之中倉每石脚價

自七錢八分以至一兩在茂州廣備等一十二處者
謂之短倉每石腳價自三錢四分以至七錢四分自
東路言之在松潘漳臘等一十二處者謂之長倉每
石腳價自六錢二分以至一兩四錢三分其先年固
自有經制也嗣謂彼中官軍消長不齊故逐年會計
雖云詳慎之一端要亦約其大槩耳豈斤斤於計口
而食數未而炊者哉州縣藉口於割付之未到而徵
錢愆期脚戶垂涎於價值之有餘而趨避易起甚至
中途減運進退維谷長倉詮次折乾獨多是邊與民
兩病之矣須聽本司會同該道將各倉應運米石即

以萬歷三十七年備供三十八年之數為則長短相
兼均派二路刻定書冊永為定規倘糧未有剩餘不
妨存貯以備用官軍有增益即於流積內接支惟登
報循環明白無紊廢手人易遵守餉可尅期○一慎
稽查何則往歲邊儲本司只管徵發該道只管收貯
而中間遲速完欠未之盡聞精神氣脉殊不貫串且
於江灌起脚之地即為查驗米未就道而復歸家矣
聽憑糧官閒暇之時始行給發士久待哺而何以應
急手宜早備行運米各州縣九月開徵頭運不得過
十一月二運不得過次年正月先儘長倉中短次之

每赴本司支給脚價即以該運倉口米石數目報驗
本司仍給限票二張一給該州縣一另發緊要地方
如東路則江由小河之類南路則灌縣茂州之類遇
某州縣糧到該地方官即以本司原票馬上通報倘
不如期如數者行該州縣查完其完納一倉即取一
倉硃串申繳不必拘泥一州縣全完致病守候○一
酌虜米何則虜米之說自萬歷二十二年起至今止
或行或否迄無定規議復議寢有同聚訟大抵職邊
防者欲有備而無患司出入者恐額外之不敷均為
地方計也今據該道議欲買米萬石以備緩急仍以

五年為率每年於正數內減運二千在目前雖似驟
發在日後無損絲毫是邊儲與財用兩得之矣每米
一石脚價共銀一兩八錢六分計一萬石該銀一萬
八千六百兩備行松潘道差官赴司支領前數其委
買員役派頓倉口與手稽核完欠數目俱聽該道酌
行即以三十七年備供三十八年額內減運二千石
至第五年預買扣除悉仍舊貫○時大中丞俱可其
議但以東路糧米改派綿彰等州縣徑運一節第不
知人情樂就否須再一查議務使小民稱便經久可
行隨移會該道牒稱行據綿州申稱行據彰明縣申

蜀中邊防記 卷之一 二十七
拘集四鄉里老楊希賢等訴稱本縣每年額徵大糧
四千餘兩每年除存留支給官吏師生俸廩并兌買
賞番布疋共去銀八百四十六兩零解司大糧尚有
三千二百有奇如將前項大糧盡徵本色十分便益
且貧民毫無生理得領腳價往來度日誠為便益諛
本縣看得坐派糧米民情之樂從已無疑矣即以本
縣應解大糧註定米價盡數派成米石九月秋成徵
收入倉領腳價募夫起運不易之策也又據平武回
稱本縣原係土司改流竝無解司糧餉其本縣應買
之數照依舊則徑赴本司請發米腳價銀下縣令

設實買米雇腳赴倉完納徑取通關銷繳倘有違悞
本縣敢任其責等因到州該攝州事羅江縣知縣夏
之鳳查看得邊糧關係甚重腳頭貽害已深不一改
絃而易轍非惟於邊無濟抑於民有累也祇為奸猾
資耳本州頗產穀米比照南路一例徵解可近無累
于民而遠有裨于邊矣即腳頭垂涎盤據難以准從
又諛本道看得買運松潘東路糧米俱係各州縣市
棍營充腳頭領銀隨費遂致邊儲日虧逋欠日甚今
改議各州縣糧米徵收本色赴領腳價徑運該倉誠
為妥當既經行據各州縣回報民皆樂從但平武縣

不產五穀或發銀令該縣僉報殷實承買准此又該
本司看得輸邊重務也改革難言也苟非小民之所
樂從則不可行即行矣亦不可久寧為慎重勿失鹵
莽長策也但江綿地方頗皆產米米價每石五錢者
其常也松邊之米定價五錢三分倉斛又縮於市斗
焉此在百姓享什一之利而司帑省出入之煩也且
未但徵之民耳非即民運也州縣赴司而領腳價仍
舊雇腳譬如商販然分運者以母錢付託經紀買貨
隨手花費而貨不可必得徑運者買成貨物雇腳盤
運可計程而抵舍矣此無論東路即南路亦然既經

覆查前來相應脩行該道轉行綿州江油彰明二縣
遵照自三十八年為始照坐定糧米於各州縣大糧
起派每石照例折銀五錢三分平武縣原無大糧照
舊赴司領價其年例腳價俱聽本司請發行各掌印
官董理雇腳起運及照梓潼縣僻遠又非產米之處
應行裁革安縣詳允之後愿由南路姑聽其便容本
司額坐倉口刊刻書冊通行遵照右有買運邊糧書
冊刻在藩司○杜甫代渝州王使君進論巴蜀安危
表臣某言伏自陛下山東收燕薊洎海隅萬里百姓
感動喜王業再造瘡痍蘇息陛下明聖社稷之靈以

至於此然河南河北貢賦未入江淮轉輸異於曩時
唯獨劔南自用兵以來稅歛則殷都領不絕瓊林諸
庫仰給最多是蜀之土地膏腴物產繁富足以供王
命也近者賊臣惡子頻有亂常巴蜀之人橫被煩費
猶自勸勉充脩百役不敢怨嗟吐蕃今下松維等州
成都已不安矣楊琳師再脅普合駟駟兩川不得相
救百姓騷動未知所裁况臣本州山南所管初置節
度庶事草創豈暇力及東西川哉伏願陛下聽政之
餘料巴蜀之理亂審救援之得失定兩川之異同問
分管之可否度長計大速以親賢出鎮哀罷人以安

反仄犬戎侵軼郡盜窺伺庶可遏矣而三蜀大府也
徵取萬計陛下忍坐見其狼狽何不即為之臣竊恐
蠻夷得恣屠割耳實為陛下有所痛惜今梁州既置
節度與成都足以久遠相應矣東川更分管數州於
內幕府取給破弊益甚若兵馬悉付西川梁州益坦
為聲援是重歛之下免出多門西南之人庶幾有活
望焉必以戰伐未息勢資多軍應須遣朝廷任使舊
人授之使節留後之寄綿歷歲時非所以塞衆望也
臣於所守封界連接梓州正可為成都東鄙其中別
作法度亦不足成要害徒擾人為伏惟明主裁之勅

天下徵收赦文減省軍用外諸色雜賦名目伏願損之又損劔南諸州亦因而復振矣將相之任內外交遷西川分閫以仗賢俊請慎擇重臣有臨危制變之明者觀其樹勲庸于當時扶泥塗於已墜借如火戎倣擾臣素知之臣兄承訓自沒番以來長望生還偽親信於贊普探其深意意者報復摩彌青海之役決矣同謀誓衆於前後沒落之徒曲成翻動陰合應接積有歲時每漢使回蕃使至帛書隱語累嘗懇論臣皆封進上聞屢達臣兄承訓憂國家緣邊之急願亦勤矣况臣本隨兄在蜀向二十年兄既辱身蠻夷相

見無日臣比未忍離蜀者望兄消息時通所以戮力邊隅累踐班秩補拙之分淺待罪之日深蜀之安危敢竭間見萬一少裨聖慮遠人之福也愚臣之幸也
○天寶元年孫逖為宰相賀隴右破吐番表云臣等先在城中因奏事陛下謂臣等曰朕料至重陽已未諸軍必頻尅捷臣等欽承聖旨詎測神功近者隴右果奏斬獲莽布支并生擒蘇毗王及蠻駕將迴劍南節度使章仇兼瓊又奏西山將士分為五道破吐蕃城堡鎮柵等四十餘所四鎮節度馬靈察又奏破吐蕃蕃不可勝數并開護密識愿等數國共為邊捍者數

旬之間三方告捷應如影響合若符契禁暴如武盡
決如宸衷知未似神更超於繫表斬級獲醜陷陣隳
城分南方之五將舉無遺策道西城之諸蕃仍為外
蔽百戰百勝以夷攻夷高居九重懸料萬里所以彰
睿略之天贊知犬戎之日蹙臣等忝陪巡幸預奉德
音湧躍之誠實倍恒品無任欣慶之至謹奉表陳賀
以聞○大歷十年常袞賀劔南破西蕃表云臣某言
今日伏見劔南西川節度使崔寧所奏露布十一月
七日於劔南大破吐蕃斬首八千五百級生擒九百
四十二人獲牛馬器械一千萬計者陛下以西戎負

恩連歲設備近興武旅遠鑠王師故隴上無虞邛南
每捷事同符契謀動鬼神凡在臣庶不勝慶快伏以
西蜀一隅犬戎乘隙聖謀潛運藩帥夔行以我同力
出其不意故得邊兵無遺鏃之費狂寇有輿尸之凶
名王首將既充俘馘要塞堅城亦入封守神武之德
莫測掃除之勢足徵天聲一臨風動萬國則方隅不
擾候我綏懷夷夏大同期於指掌臣等覩茲大捷愧
乏嘉謀慶躍之誠實倍恒品○貞元元年韋臯破吐
蕃露布云尚書兵部臣常臯等言臣聞天討有罪兵
應者勝義者王夷不亂華師直為壯曲為老多助之

至四極爰轉貞觀則同羅延擊陀開元則九姓殄默
啜曰商莫不來享犯漢雖遠必誅德風鷄手河源武
節愔手月崑率寧人之有指先元戎以啟行信用威
光祖宗不以賊遺君父恭惟皇帝陛下宣昭義問數
寧武功纘八葉之鴻圖奮四征之雄略懷慕鷓銷祲
泯稟仰天和剪鯨鯢清郊掃除羣穢王原猷允塞我
武惟揚奇幹善芳各修貢職條支若木咸順旨令邈
積石之遐陬有吐蕃之醜類侵敗王略倍奸齊盟乘
邊將之聘兵瞰戎亭之虛候為蛇豕食上國盡盜河
湟帥蝥賊搃我疆再驚畿甸騎溢致於深入鑿蹕至

於親屯擱然授兵協以謀我尚納汚而含垢姑通事
以結和清水之盟未乾好時之師已聚指涇靈而徼
賂圍鹽夏以擣虜夷德無厭弗悔衽金之既楚氛甚
惡輒興裘甲之謀蠢爾為讎整居匪茹維時南詔慕
化中朝先零之質諸羗雄嘗并力麋人之率百濮罔
不離心頓頽於邊受命於吏斷匈奴之右臂羈南越
以長纓夔貉輸致駟之勤晉戎成倚鹿之勢彼既失
鐵橋之險我遂克岷和之邪盍竄匿於龍堆復虔劉
乎鱗塞戕我守將墮我裨隍修戈矛而與同仇靡室
家不遑寧處臣等請奮其旅以殲乃讎鳳翔振武靈

武之騎獵其西邠寧太原涇源之兵震其北率山南
熊羆之校暨東川龜虎之師烏蠻撓其腹心回鶻搏
其肘腋衆素飽矣壹大治之諸將陳洎等統五萬軍
出十一道濟師西顧之半策勛北陸之初盪平七城
斬馘萬級獲鎧械五十萬計燔堡壘百七十餘遂賈
勇而圍昆明將決勝而定青海為東境五節度大使
論莽熱釋朔方之衆援維州之城九攻九却之計窮
七縱七擒之威速連連執訊矯矯獻囚不然我薪而
自焚有如破竹之立解拂廬魚潰甌脫鬼犇谷靜山
空行就馬耆之僂區殫域滅訖聞智聖之降斯皆廟

謨淵深神斷天造明見萬里運竒堂上之兵守在四
夷制勝目中之虜勒功滇池之柱植表赤頌之碑一
怒安民文之勇也三軍用命克何力馬臣等承帝之
明教王所愾開遠門揭戾坐收西極之舊封紫微殿
受得重觀昆立之茂績臣等無任慶快激切屏營之
至謹遣某官奉露布以聞○今玆楚賀劔南奏破吐
蕃表臣某言當道進奏院狀報六月某日劍南節度
使韋臯狀奏破吐蕃五千餘衆生擒大酋官七人陣
上殺一百五十餘人收獲牛馬四百餘頭足器械一
千五百餘事者吉語遠及歡聲相接中賀臣聞順實

臣道伏順者至柔而全禮為天經無禮者雖衆必敗
陛下君臨萬國天覆兆人恩覃於幽微澤及乎荒遠
蠢茲蕃醜假息西陲惟天地含弘之心未能剪滅以
豺狼貪戾之性輒肆陸梁爰整其師不攻而取此皆
降睿略於天下頒明謀於閭外制士之死命得人之
歡心所以殪戎如羊破虜如蝨毆彼牛羊獲其戾王
威加于殊域武暢乎羣動自然赤山之壤可蹈清滢
之波可涉必當封土刻石以垂天聲戎臣司武獲覩
其慶不勝歡抃之至。權德輿賀雲南軍破吐蕃劍
山保定城表云臣某言伏見劍南西川節度使某官

某所奏兵馬使宗晃前月十八日與雲南軍合勢攻
破吐蕃劍山保定城當日斬城使者伏以聲教所被
遐邇大同蠢茲西戎尚有遺類或犯亭障且稽靈誅
陛下睿算無窮天威遠震以夷裔感恩之衆佐藩隅
制勝之臣取以多方累獻戎捷事皆前定必稟聖謨
斬將搴旗出於料外堅城便地書落鼓中通荒服會
朝之途絕餘孽窺覲之隙奉威懷之命以律而臧兼
夷夏之師在和而克此皆陛下神武潛運妖氛永清
由是成擒自當盡敵臣等謬當樞近媿之廟謀幸觀
成功不勝大慶無任欣抃之至謹奉表陳賀以聞○

宋羅泌蜀山世紀論曰嗚呼山川設險此天地之所
以限疆界也嗟人之生雖聖且智其精神固有限劑
而動地之不可極今古同也奈何多欲之君溪心壑
志貪以取敗然後百罅啓而天地閉矣予讀揚雄蜀
紀而感夫蜀之所以通中國者夫蜀之為國富羨饒
沃固自一天壤也西番東漢北秦南廣一障之隔自
生民以來君君世世紹蜀不知有中國而中國亦莫知
有蜀五帝以來羈縻服外蜀固不為中國少而中國
亦不為蜀不足也周衰之時蜀王貪恠求欲無厭故
秦惠得以圖之飾妖嬈之子劉怪誕之牛以誘其衷

而後褒斜之路棧矣以故秦入得蜀之資而遂併天
下自是蜀山不閉莫有其有至于今為中州則貪求
之所致也一自中國之有蜀也故不可謂之無利也
然而風動之辰常先他國而綴靈府一或入保則無
復中國之所有者是其為國固鬼神之所作也予既
讀蜀紀而感夫蜀之所以通中國者及讀陳子昂之
疏而又幸蜀之不通於吐蕃也夫吐蕃之於蜀猶昔
日之秦於蜀也方其挈唐之兵大戰則大勝小戰則
小勝幾十載矣未嘗止一旅也以薛仁貴郭待封龐
武之將屑十萬衆於大非之川一甲不歸以李敬元

劉審禮廊廟之宰辱十八萬衆於青海之上竟不能
得一醜而閔隴為墟可謂殲矣然其涎垂全蜀之珍
如是之久而不得食者徒以山川之阻絕而障塞之
不通也胡為議者欲以梁鳳巴峽之兵開蜀道繇雅
州以討生羗而襲吐蕃夫羗人固未易討而昔者東
漢之所繇喪敗者也嗚呼其亦幸而不成歟萬一生
羗可破而蜀道遂開則蜀之瑤庫自此轉而西矣使
我而得吐蕃其財固不足以裕國其地固不足以穡
也而徒戮無辜之民竭有常之帑以徇之爾其或得
之而得以穡亦何異於釋近塾而創遠業乎又何異

於舍己之田而芸人之田者也况己之田舍矣而它
人之田未及芸邪昔者漢之武帝好大而喜功使者
張騫乃反誇以西域之富於是噉丘以爭之四十年
間中都之財賦夏國之生靈略盡於西域矣非不得
其地也得朔方之郡而自不能以耕也非惟不能耕
也得朔方之生而棄工谷造陽之熟以予故矣其所
以危士臣以締怨者得大宛良馬數十而已使齊楚
之巨擘怨而交訟所爭亦不啻是一何默邪嗟呼武
之轍既覆於前矣而隋之裴矩又以西域之圖蕩揚
帝之侈心於是親出玉門置伊吾且未而閔右蕭然

始恃威疆卒歸狼狽此魏公之所以傷之者也顧不
遑歟予常言之溟渤洪漲此天地之所以限東徼也
惡溪沸海此天地之所以限南徼也臨河懸度之設
乎西瀚海沙子之設乎北此天地之所遮西而制此
北者也徼障霧於東維界黑水於南極泄流沙於西
陸決弱水於北滅此天地之所以界四維也八荒之
內奚有奚無八荒之外何窮何止古之聖人一視同
仁為吾臣與為狄人臣奚以異是故人得其君則已
矣請試舉一隅以憲之方昇明之二年委王奉表以
條其祖之勛謂東西之所服者二百九十有六國是

固海東之國也倭王之所服者也其所不服者幾什
伯君其盡制歟支顛西游道其所記亦數百國此于
甸以西國也支顛之所知者也其不知者又不知其
幾也知猛法盛之錄曇勇道安之傳審至之國不下
三四五百大庭四域之使魏氏四道之賓所奏之國
亦不下三四五百此世之未嘗聞者是數千國者
固俱樂土也其地可謂遠矣而其人亦未嘗有能道
天之涯地之角者惡乎貪而不知己邪慮亂者穿其
頤志遠者賴其目黃帝堯舜不能服遠也而所守
者域服之外一無所事其在周公亦不過曰諾爾戎

兵陟禹之迹而已夫禹聲教暨於四海而其制中國
若是截也伊尹四方之令狗國豹胡亦不過三十有
六國來者不可拒往者不尔進又曷嘗勞吾萌宣吾
府而奉之哉噫先王之政教其施於中國者盖詳矣
推先三之政教以治中國則禹之所制不為少矣不
繇先王之政教則禹之所制猶將不異於戎狄彼以
遠畧誇後世而不詳乎其內者是豈禹之心也哉未
世之君不知古者之所以為國而以貪求速敗豈禹
反感邪嗚呼其亦不聞蜀漢隋氏之事則已矣少有
所知有不為之寒心哉○陳子昂感思詩丁亥歲云

暮西山事甲兵羸糧匝邛道荷戰爭羗城嚴冬陰風
勁窮岫泄雲生昏曠無晝夜羽檄復相駕拳跼競萬
仞崩危走九冥藉：峰壑裏哀：冰雪行聖人御宇
宙聞道泰階平肉食謀何失藜藿緬縱橫自註云元
寶六載丁亥吐蕃圍松州也杜甫西山詩辛苦三城
戍長防萬里秋煙塵侵火井雨雪閉松州風動將軍
幕天寒使者裘漫山賊營壘回首得無憂嚴武軍城
早秋詩昨夜秋風入漢關朔雲邊月滿西山更催飛
將追驕虜莫遣沙場疋馬還杜甫和云秋風嫋：動
高旌玉帳分弓射虜營已收滴博雲間戍欲奪蓬婆

雪外城薛濤罰赴邊有懷上常令公詩聞道邊城苦
今朝到始知羞將門下曲唱與隴頭兒其二點虜猶
違命烽烟直北愁却教嚴譴妾不敢向松州我明楊
慎雪關謠云雪關謠者途人思何將軍也雪山關雪
風起十二月斷行旅霧為箐水為苔馬毛縮鳥鳴哀
將軍不重來西路何時開按將軍名卿字蓋臣合肥
人成都前衛指揮余事弱冠即戎正德戊辰守備威
茂庚午征流賊手刃數人值東蠻出劫安縣警連大
印落鬼蜮圍壩底城二旬卿出奇破之又報捷於土
門威名大振庚辰論功晉指揮使擢都指揮視閩篆

嘉靖壬午充小河叅將未幾芒部亂遷永寧叅將擒
隴政支等繕城署建學校瀘人多繪像祀之丙戌擢
松潘總兵時南路梗塞數十年矣公至悉圖恢復改
河脩堡鑿險為夷於是始通癸巳奉命專征茂州五
寨殊死戰奪虎頭崖等險克平十一寨進中府都督
余事仍領松鎮得節制東南大脩長安馬路師家永
平堡於善地增脩禦寇虜諸墩以扼除儲薪利用鑿
泉便汲隨處賴之復裁省各路每年安班番賞以萬
計沿邊建營為間二萬有奇夾路邊垣障蔽一千餘
里丙申渾水溝等蠻復叛一鼓平之庚子進都督同

知癸卯用言官議以名將徵入本兵會推總督禁營
力遜避乙巳奉勅提督東宮廳聽征總兵官會蜀白
草蠻叛撫臣疏請大征兵擬三萬有奇糧擬四十萬
石時值大飢公至惻然兵減三分之二糧減十分之
九因敵為糧用降為導直搗巢穴盡殲渠魁餘黨請
降獻地輸貢皆其力也公為人清心寡慾號令嚴明
恩威兼濟動中樞宜平時涉獵書史咨謗邊務身先
餘豫以風武弁邊氓父老謂丁大夫之後一人而已

蜀中邊防記卷之一終

